

E Denkmol ferr die ersde Flerschemer

Om letzde Sunndaach hawwe merr beim Karl dehoom enn Dämmer-schoppe gedrunke unn hawwe debei iwwer dess neie Buch von Flerschem geschwätzt. Dess heeßt „Vom Wachsen und Werden einer Stadt“ unn iss e schee Buch, hott de Karl gesacht, dess muss merr gelese hawwe.

Unn dess iss aach e schee Geschenk, hott die Paula gemoont, wenn ooner von de Verwondschaft odder von de Freunde weit weg wohnt unn dich zum Feiern oigelade hott unn wennde nit waaßt, wasdem sunnst mettnumme sollst.

Ich habb gesacht: Awwer noochdem ich drin gelese habb iss merr uffgefalle, dass mir Flerschemer bei dene gonze Feiern mettem doppelte Stadtjubiläum ebbes vergesse hawwe.

Ei was hawwe merr donn vergesse?, froocht de Schorsch.

Wissder, hab ich zur Ontwort gewwe, merr hawwe doch diesjohr die fuffzich Johr Stadterhebung gefeiert unn dass Flerschem vor 1175 Johr zum ersde Mol in sooner Urkund erwähnt worrn iss.

Ja unn? hotts Kättche gesacht, mir hawwe doch all schee gefeiert. Awwer du moonst, ess wär was vergesse worrn?

Ich habb genickt: Ess iss vergesse worrn, de ersde Flerschemer e Denkmol ze setze.

Was dann ferr ersde Flerschemer, hott de Schorsch gefroocht, wer warn dann die?

Also, habb ich gesacht, in der Urkund aussem Johr 828 steht doch, dass hier in Flerschem ...

Honnes, sacht de Karl, doomols hotts noch Flaritesheim gehaaße.

... dass in Flaritesheim zwaa Leit iwwertraache, also sozesaache zwaa Bedienstete verkaaft worrn sinn. Unn nit dass ooner die verkaaft hott, na, dass ooner die kaafe wollt, dess iss merr uffgefalle. Dess zeicht doch, dass dess zwaa Kerle warn, die merr gebrauchte konnt. Awwer dass ooner verkaaft hott haaßt villeicht aach, dass die zwaa ihm Herrn alsemol Widderwort gewwe hawwe unn der dann froh war, dass se los kriecht hott. Er wollt dess joo aach schriftlich hawwe, weil wenn emol e Reklamation iwwer dene ihr Uffsässigkeit kumme sollt, dann konnder immer saache: Dess warn nit moi Leit, ich habs schriftlich. Unn deshalb moon ich, dass dess die ersde Flerschemer warn: Die hawwe was gedaucht, hawwe aach emol ihr Maul uffgemacht unn die warns wert, dass merr se nit oofach ohne Quitung verkaaft hott wie e Wuzz odder e Schoof.

Doo hosde Recht, sacht de Karl, dene zwaa sollt merr werklich e Denkmol setze. Weil so sinn mir Flerschemer heit noch: Mir sinn was wert, uns konn merr gebrauchte unn mir losse uns nit alles gefalle, was die doo owwe mett uns mache wolle. Dess merkt merr joo jetz mettem Fluchhafeausbau.

Dess Kättche hott genickt: Awwer verkaaft werrn merr aach heit widder, gell?

Die Paula war gonz erschrocke: Moonsde dassе uns on die Fraport verkaafe, weil merr zuvill Widderwort geeche de Ausbau gewwe hawwe? Unn wer kriehden dann die Quittung?

Doo sach ich: Lieb Paula, dissmol werrn merr verkaaft unn kriehn aach selbst die Quittung, weil merr unserne Herrn zu wenich Widderwort gewwe hawwe. Setze merr also lieber de ersde Flerschemer e Denkmol.

Eiern Honnes